

Due poesie di Valerio Da Pos (1740 - 1822)

Mi nel 1780

*Saveu che xe passà quarnta anneti;
Che son al mondo, e stago a quel che vien:
Rido se vedo che la me va ben,
E, se la me va mal, tiro cospeti.*

*La Fortuna me fa tutti i despeti.
E sempre el pie' sul collo la me tien,
A mi no la me dà se non velen,
Ai altri la ghe dà spassi e dileti.*

*Che fazzio mi per cogionar costia,
E per farla andar zò? Mando el cervello
In te la Luna, ch'è sorella mia.*

*Fazzo sonetti per questo e per quello
E sullevo cusì la fantasia,
E le rane cussì mando al bordello!*

Contro un permaloso

*Voria almanco saver per che rason
Quando v'incontro, amigo benedeto,
Contro il vostro costume consueto
Me voltè contro tanto de muson.*

*Perché, se no ve ne ho dà mai occasion,
Son omo che me sbasso e me remeto:
Savé che non è nissun senza difeto,
E chi crede esser tal è un gran cogion.*

*Vogio far un scrutinio general
Sora de le mie azion de ciascun zorno
Per poder rilevar dove xe el mal.*

*Se no son reo, quando a incontro ve torno,
Voltème pure quel muso de stival
Quanto volè che non m'importa un corno.*